

*** ESTATUTOS DO CLUB ***

Proxecto para aprobación en Asemblea Xeral Extraordinaria

CLUBE DE MONTAÑA XISTRA

CAPITULO I:

NORMAS XERAIS:

Artigo 1º.-

O CLUBE DE MONTAÑA XISTRA é unha Asociación privada con personalidade xurídica e capacidade de obrar, sen ánimo de lucro, integrada por persoas físicas ou xurídicas, con domicilio na Comunidade Autónoma de Galicia, que ten como obxecto primordial o fomento promoción e o impulso da práctica continuada dunha ou varias modalidades deportivas, así como a participación en actividades e competicións deportivas calquera que sexa o seu nivel e destinatario.

Artigo 2º.-

O CLUBE DE MONTAÑA XISTRA practicará como principal modalidade deportiva a do montañismo, en tódalas súas opcións, e solicitará a ratificación dos Estatutos e a inscrición no Rexistro de Entidades Deportivas de Galicia, de conformidade coa Lei do Deporte de Galicia.

O CLUBE DE MONTAÑA XISTRA practicará promoverá e fomentará así mesmo as modalidades deportivas recreativas e/ou competitivas de sendeirismo, excursionismo, trekking, orientación, andainas, andainas de regularidade, marchas por montaña, marchas de fondo, marcha nórdica, campamentos e vivacs con fins alpinísticos ou montañeiros fóra das instalacións comerciais, alta montaña, alpinismo, expedicións polares, escalada en terreo natural (rocha, xeo e mixto), escalada en rocódromo, escalada deportiva e olímpica, rápel, tiroliña e similares, vías ferratas, barranquismo (excursións e percorridos por barrancos, canóns e desfiladeiros en tódalas súas modalidades e combinacións), coasteering, espeleoloxía, carreiras por montaña, carreiras de orientación, raquetas de neve, esquí de travesía ou de montaña, splitboard, snowboard e outras modalidades deportivas que teñan a

natureza e a montaña como escenario, e para tal fin funcionarán as seccións deportivas correspondentes, sen prexuízo de que a Asemblea Xeral poida acordar a creación doutras.
Tódolos ingresos e beneficios da entidade, obtidos das cotas sociais, cotas ou inscricións en actividades, alugueiro de material deportivo, subvencións públicas, achegas ou doazóns de terceiros, serán aplicadas unicamente ó cumprimento dos fins sociais deportivos indicados en proporción ós gastos xerados e orzamentados, sempre xestionados dende a estrita observancia e control da súa cualificación como entidade sen ánimo de lucro.

O CLUBE DE MONTAÑA XISTRA poderá ceder gratuitamente ou alugar ós membros da entidade, persoas asociadas o afiliadas, calquera material técnico, dispositivos, mapas, elementos de seguridade e caixas de primeiros auxilios da súa propiedade, para a práctica das actividades deportivas deste artigo, ben en actividades organizadas e en grupo, coma en actividades particulares e/ou individuais.

O CLUBE DE MONTAÑA XISTRA velará pola realización das actividades deportivas, competitivas ou non, sempre coa máxima seguridade dos asociados e afiliados. Para isto utilizará os medios materiais necesarios dispoñibles e fomentará a información e formación das persoas organizadoras e participantes.

O CLUBE DE MONTAÑA XISTRA, en consonancia co Artigo 22 da Constitución Española e da Lei Orgánica 1/2002 de 22 de marzo, reguladora do Dereito de Asociación, é unha entidade “non secreta”, rexistrada e pública. Está dirixida á calquera persoa física sen restricións de carácter de xénero, condición, credo ou ideas políticas. A entidade ofertará as súas actividades sociais a persoas asociadas, afiliadas e incluso ó público en xeral, co fin de promover o deporte e as prácticas saudables na natureza, utilizando calquera medio de publicidade legal en España e Galicia en aplicación la liberdade de comunicación recollida no artigo 20 da Constitución.

Artigo 3º.-

O domicilio Social do CLUBE DE MONTAÑA XISTRA fíxase na rúa Zaragoza 62 int. (fondo do patio), C.P. 36211, da poboación de Vigo, dispón do Apdo. Correos 5.430 – 36200 VIGO, e do teléfono e fax + 34 886 11 70 11. Dispón da web www.xistra.org e do correo electrónico info@xistra.org.

O Presidente cando as circunstancias o aconsellen, poderá acorda-lo cambio do domicilio social dentro da mesma localidade. Para o traslado do domicilio a outra localidade, que deberá ser sempre dentro do territorio da Comunidade Autónoma de Galicia, será necesario o acordo maioritario da Asemblea Xeral Extraordinaria.

En ámbolos casos, o traslado de domicilio social non implicará modificación estatutaria, e terá de ser notificado ós socios, e ó Rexistro de Entidades Deportivas de Galicia.

CAPITULO II

CLASES DE MEMBROS DA ENTIDADESOCIOS, ADMISIÓN, DEREITOS E OBRIGACIÓNS

Artigo 4º.-

O número de socios/membros da entidade será ilimitado. A Asemblea Xeral poderá suspender, non obstante, a admisión de novos socios/membros cando así o esixan razóns de aforo ou capacidade física das instalacións. Os socios/membros da entidade poderán ser das seguintes clases: socios de número, honorarios e aspirantessocios aspirantes, socios honorarios, afiliados e simpatizantes.

Artigo 5º.-

Son socios de número tódalas persoas físicas maiores de idade, que satisfagan a cota social establecida pola Asemblea Xeral e tramiten unha licenza e/ou seguro deportivo a través desta entidade.

Os menores de 18 anos, clasificaranse como socios aspirantes, tendo dereito ó uso das instalacións sociais mediante a cota que se fixe, conha licenza e/ou seguro deportivo a través desta entidade, e pasarán automaticamente a ser socios de número ó cumpriren a maioría de idade.

Serán socios honorarios aquelas persoas ás que a Asemblea Xeral confira esta distinción e terán un posto de preferencia nos actos oficiais da sociedade.

Serán **afiliados** aquelas persoas que, non tendo a plenitude de dereitos e obrigas dos socios, se inscriban en calquera momento, incluso de forma temporal, coma deportistas na entidade, para calquera proba, evento, curso, ou actividade promocional deportiva, e sempre deberán subscribir o correspondente seguro deportivo obrigatorio segundo a Lei vixente.

Son **simpatizantes** aquelas persoas físicas ou xurídicas que se inscriban en calquera momento, incluso de forma temporal, como colaboradores, axudantes ou voluntarios, aportando axuda persoal e/ou económica á entidade pero sen realizar actividade deportiva nin ter obriga de tramitar un seguro de accidentes deportivo.

Artigo 6º.-

1.- Os socios de número terán os seguintes dereitos:

- a) Contribuír ó cumprimento dos fins específicos da asociación.
- b) Esixir que a Asociación se axuste ó disposto na normativa autonómica deportiva e ó establecido no presente Estatuto.
- c) Separarse libremente da Asociación .
- d) Coñece-las actividades da Asociación e examina-la súa documentación, previa petición razoada ó Presidente.
- e) Expor libremente as súas opinións no seo da Asociación.
- f) Ser elector e elixible para os órganos de representación e goberno da Asociación, sempre que teña plena capacidade de obrar -e pertencer ás Asembleas Xerais con voz e voto.

2.- Son obrigacións dos socios de número:

- a) Aboa-las cotas que esixa a Asemblea Xeral.
- b) Contribuír ó sostemento e difusión do deporte ou modalidades Deportivas.
- c) Acatar cantas disposicións dite a Asemblea Xeral, a Xunta Directiva ou Presidente, para o bo goberno da sociedade.

3.- Dos socios aspirantes:

- a) Os socios aspirantes terán dereito a aproveitarse dos servizos e instalacións sociais da Asociación, aboando as cotas previstas e contribuíndo ó sostemento económico da entidade.
- b) Carecen de voto nas Asembleas Xerais.

4.- Dos afiliados:

- a) O período mínimo para ser afiliado establécese nun día (1 día) e o máximo queda determinado pola duración máxima do evento ou actividade á que estea suscrito.
- b) Os afiliados carecen dos dereitos do Art. 6.1. b) d) e) e f).
- c) Os afiliados non teñen as obrigas do Art. 6.2. a)

5.- Dos simpatizantes:

- a) Para estes membros da entidade serán de aplicación preferente as Leis correspondentes ó Voluntariado e ó Mecenado.

Artigo 7º.-

- 1. Para ser admitido como socio de número, aspirante ou honorario, en calquera das súas modalidades, será necesario:

- 1.1 Te-la idade sinalada para cada unha delas.
- 1.2 Solicitud por escrito dirixida ó Presidente.
- 1.3 Satisface-la cota de ingreso correspondente.
- 1.4 Tramita-la licenza deportiva correspondente.

- 2 Para ser admitido como afiliado será necesario:

- 2.1 Facer a inscrición nunha proba, evento deportivo ou calquera outra actividade do club, aportando tódolos seus datos de identificación.
- 2.2 Subscribir o correspondente seguro deportivo para a actividade na que está inscrito.
- 2.3 Satisfacer os gastos proporcionais asignados a cada participante de custe da actividade correspondente (seguro, avituallamentos, desprazamento, etc.)

- 3 Os simpatizantes serán admitidos segundo un regulamento interno especial.

Artigo 8º.-

A condición de ~~socio~~ membro da entidade pérdese:

- a) Por vontade propia.

- b) *Por falta de pago das cotas sociais durante tres meses consecutivos, previo requirimento de pago, e consecuente Resolución do Presidente.*
- c) *Por acordo do Presidente no seu caso, fundado en faltas de carácter grave, previa audiencia do interesado, que haberá de ser ratificado na primeira asemblea xeral que se celebre.*
- d) *Por calquera outra causa establecida na lexislación vixente.*

CAPITULO III

ÓRGANOS DE REPRESENTACIÓN E GOBERNO

Artigo 9º.-

Son Órganos de representación e goberno do Club, a Asemblea Xeral e o Presidente.

Artigo 10º.-

O Presidente é o órgano executivo do Club, posúe a representación legal convoca e preside os órganos de representación e goberno executando os acordos destes.

O cargo de Presidente é a título gratuíto e carente de interese nos resultados económicos da explotación, por si mesmo ou a través de persoa interposta.

Será elixido mediante sufraxio libre, directo, igual e secreto por e entre os membros da Asemblea Xeral, coma mínimo cada 4 anos. Previamente a finalizarse o prazo polo que foi elixido, realizarase unha convocatoria de eleccións establecéndose un calendario e un regulamento electoral conforme as leis, normas e estatutos vixentes.

Artigo 11º.-

O Presidente cesará por:

- a) *Transcorre-lo prazo polo que foi elixido.*
- b) *Dimisión.*
- c) *Falecemento ou incapacidade física ou psíquica para continuar no exercicio do seu cargo.*
- d) *Aprobación dunha moción de censura pola Asemblea Xeral.*

- e) *Inhabilitación por sentenza xudicial firme ou sanción deportiva.*

Artigo 12º.-

- 1. Como órgano complementario dos de goberno e representación poderá haber unha Xunta Directiva que actuará como órgano colexiado de xestión do Club, e exercerá as funcións que este estatuto lle confire.*
- 2. Os membros da Xunta Directiva serán designados e revocados libremente polo presidente, debendo dar conta diso na primeira Asemblea Xeral que se celebre. Da mesma formará parte un secretario e un tesoureiro. Tódolos cargos serán gratuítos e carecen de interese nos resultados económicos do Club por si mesmos ou persoa interposta.*

Artigo 13º.-

- 1. A Xunta Directiva quedará validamente constituída en primeira convocatoria cando concorran a ela a maioría dos seus membros. En segunda convocatoria será suficiente a concorrencia, polo menos, de tres dos seus membros, e, en todo caso do Presidente.*
- 2. A Xunta Directiva convocarase polo Presidente con dous días de antelación como mínimo, á data de celebración.*
A Xunta Directiva quedará tamén validamente constituída, cando estean presentes tódolos seus membros, aínda que non houbera mediado convocatoria previa.
- 3. En especial corresponde á Xunta Directiva:*
 - a) Dirixir a xestión do Club, velado polo cumprimento do seu obxecto social.*
 - b) Formular o inventario, memoria e presuposto anual, que se someterá a aprobación da Asemblea.*
 - c) Aplicar tódalas medidas deportivas, económicas e administrativas precisas para o fomento e desenvolvemento do deporte dentro do Club.*
- 4. Excepcionalmente en casos de forza maior, ou por necesidades especiais xustificadas, as reunións da Xunta Directiva poderán realizarse de forma non presencial, mediante medios telemáticos adecuados, debendo levantar acta e sendo esta asinada posteriormente de forma presencial ou telemática polos membros asistentes.*

Artigo 14º.-

O Secretario da Xunta Directiva coidará do arquivo da documentación, redactará cantos documentos afecten á marcha administrativa da Asociación e levará o Libro de rexistro de socios e o Libro de Actas.

Artigo 15º.-

- 1. O Tesoureiro da Xunta Directiva será o depositario da Asociación, asinará os recibos, autorizará os pagos e levará os Libros de Contabilidade.*
- 2. Será obriga do Tesoureiro formalizar, durante o primeiro mes de cada ano, un balance de situación e as contas de ingresos e gastos, que se porán en coñecemento de tódolos asociados.*

Artigo 16º.-

- 1. A Asemblea Xeral é o órgano supremo do goberno do Club e estará integrada por tódolos seus socios de número.*
- 2. As Asembleas Xerais, tanto Ordinarias como Extraordinarias, quedarán validamente constituídas en primeira convocatoria cando concorran a ela a maioría dos seus asociados. En segunda e última convocatoria media hora máis tarde, quedará constituída calquera que sexa o número de membros presentes. Entre a data de convocatoria e o día sinalado para a súa celebración terán de mediar, como mínimo, dez días naturais e non poderá transcorrer máis de 20.*
- 3. Excepcionalmente en casos de forza maior, ou por necesidades especiais xustificadas, autorízase á celebración das Asembleas Xerais Ordinarias de forma non presencial mediante medios telemáticos. As convocatorias deberán ser realizadas nos prazos recollidos neste artigo, mediante a publicación da convocatoria e da orde do día na web oficial do club e con remisión simultánea da mesma información ós correos electrónicos de tódolos socios, así coma cun aviso resumido mediante o envío de SMS ós teléfonos móbiles dos mesmos no mesmo día. Os datos persoais de contacto serán os recollidos nas fichas de socios e é obriga de cada socio comunicar por escrito calquera cambio ó respecto.*

A entidade procurará, na medida das súas capacidades económicas, os medios técnicos necesarios para poder identificar de forma telemática ós socios participantes nas Asembleas Xerais Ordinarias.

Artigo 17º.-

A Asemblea Xeral convocarase polo Presidente a iniciativa propia ou do vinte e cinco por cento (25%), coma mínimo, dos socios de número.

1. *A Asemblea Xeral reunirase con carácter ordinario, previa convocatoria do Presidente, ó menos unha vez ó ano para tratar das seguintes cuestións:*
 - a) *Memoria, liquidación do presuposto, balance do exercicio, rendición de contas e aprobación se procede.*
 - b) *Presuposto para o seguinte exercicio.*
 - c) *Proxecto e propostas do Presidente ou da Xunta Directiva.*
 - d) *Proposicións que formulen os socios e que terán de ir asinadas ó menos, polo cinco por cento dos mesmos.*
2. *Terá de se celebrar Asemblea Xeral extraordinaria para a modificación de Estatutos, elección do Presidente, toma de cartos a préstamo, emisión de títulos representativos de débeda ou de parte alícuota patrimonial, alleamento de bens inmoables e fixación de cotas dos socios, e calquera outro acordo previsto nestes estatutos ou que se estime oportuno polo Presidente ou proceda legalmente.*

Artigo 18º.-

Os acordos da Asemblea Xeral adoptaranse por maioría simple dos presentes, requiríndose unha maioría cualificada e un quórum determinado de asistencia para aqueles asuntos que establezan os estatutos. Serán vinculantes e de obrigado cumprimento e terán forza executiva a partir da data da súa adopción, sen prexuízo, por razón da materia, da posibilidade da súa impugnación perante os órganos competentes e da Federación Galega Deportiva da modalidade ou perante o Comité Galego de Xustiza Deportiva.

CAPITULO IV

RÉXIME DOCUMENTAL

Artigo 19º.-

O réxime documental do Club, constará dos seguintes libros: Rexistro de Socios, de Actas e Contables.

Artigo 20º.-

No libro de Rexistro de Socios, terán de consta-los nomes e apelidos dos socios de número, o seu Documento Nacional de Identidade e, no seu caso, os cargos de representación, goberno e administración que exerzan no Club. Tamén hanse especifica-las datas de altas e baixas, e as de toma de posesión e cese nos cargos aludidos.

Artigo 21º.-

No libro de Actas, consignaranse as reunións que celebre a Asemblea Xeral e a Xunta Directiva, con expresión da data, asistentes, asuntos tratados e acordos adoptados. As Actas terán de estar asinadas, en todo caso, polo Presidente e o Secretario.

Artigo 22º.-

Nos Libros de Contabilidade figurarán tanto o patrimonio como os dereitos e obrigacións, e ingresos e gastos do Club, debéndose precisa-la procedencia daqueles e a inversión ou destino destes.

RÉXIME DISCIPLINARIO

Artigo 23º.-

Os órganos e socios do Club estarán sometidos ó regulamento disciplinario do Club e ó disposto no Título VII da Lei 3/2012, do Deporte de Galicia, e a súa normativa de desenvolvemento.

Artigo 24º.-

Así mesmo o Presidente e os membros da Xunta Directiva responderán fronte os socios, o Club ou terceiros dos prexuízos que ocasionaren por culpa ou negligencia grave, de conformidade coa regulamentación propia do Club e o Ordenamento Xurídico vixente.

CAPITULO V

RÉXIME ECONÓMICO-FINANCEIRO E PATRIMONIAL

Artigo 25º.-

1. *No momento da creación do Club deportivo, carece de patrimonio fundacional e non dispón de instalacións nin de locais propios.*
2. *No futuro o patrimonio do Club estará integrado por:*
 - a) *As achegas económicas dos socios, que aprobe a Asemblea Xeral.*
 - b) *As doazóns e subvencións que reciba*
 - c) *Os resultados económicos que pode producir as manifestacións físico-deportivas que organice a entidade.*
 - d) *As rendas, froitos e intereses do seu patrimonio.*

Queda expresamente excluído como fin do Club o ánimo de lucro e a totalidade dos seus ingresos e beneficios aplicaranse ó cumprimento dos seus fins sociais.

Artigo 26º.-

O Club poderá gravar e allear bens, mobles e inmobles, tomar diñeiro a préstamo e emitir títulos transmisibles representativos de débeda ou parte alicuota patrimonial, sempre que cumpra os seguintes requisitos:

1. *Que se autoricen tais operacións por maioría de dous terzos dos socios presentes ou representados na **Asemblea Xeral Extraordinaria**.*
2. *Que ditos actos non comprometan de modo irreversible o patrimonio da Entidade ou a actividade físico-deportiva que constituía o seu obxecto social. Para a adecuada xustificación deste extremo se poderá esixir, sempre que o soliciten como mínimo o cinco por cento dos socios de número, o oportuno ditame económico-actuario.*

3. *Cando se trate de gravar ou allear bens, mobles e inmobles que foran financiados en todo ou parte, con Fondos Públicos da Comunidade Autónoma será preceptiva a autorización previa do órgano competente da Xunta de Galicia.*

Artigo 27°.-

O Club poderá emitir títulos de débeda ou de parte alicuota patrimonial, que serán nominativos.

Os títulos inscribíranse nun libro que levará ó efecto o Club, no que se anotarán as sucesivas transferencias.

En tódolos títulos constará o valor nominal, a data de emisión, e, no seu caso, o interese e prazo de amortización.

Artigo 28°.-

Os títulos de débeda só poderanse subscribir polos asociados, e a súa posesión non conferirá dereito algún especial ós socios, agás a percepción dos intereses establecidos conforme á lexislación vixente.

Artigo 29°.-

Os títulos de parte alicuota patrimonial han ser asemade, subscritos polos asociados. En ningún caso estes títulos darán dereito á percepción de dividendos ou beneficios.

Artigo 30°.-

Os títulos de débeda e parte alicuota patrimonial serán transferidos unicamente entre os que teñan a condición de socios.

CAPITULO VI

REFORMA DOS ESTATUTOS E DISOLUCIÓN DO CLUB

Artigo 31º.-

Os presentes Estatutos só se poderán modificar, reformar ou derrogar, por acordo da Asemblea Xeral Extraordinaria convocada a tal efecto, mediante votación favorable dos dous terzos dos socios de número asistentes.

A reforma destes estatutos seguirá, con respecto ó Rexistro Entidades Deportivas de Galicia, os mesmos trámites administrativos que para a súa inscrición.

Artigo 32º.-

O Club extinguirase ou disolverase por acordo de: a) dos dous terzos dos socios en Asemblea Xeral Extraordinaria, convocada ó efecto; b) por sentenza xudicial; c) por outras causas legalmente determinadas.

En todo caso haberá de ser notificado ó Rexistro de Entidades Deportivas.

Artigo 33º.-

Disolvido O Club, o remanente do seu patrimonio social, se houbera, aplicarase a fins análogos de carácter deportivo ben por acordo previo da Asemblea Xeral ou subsidiariamente polo órgano competente en materia de deporte da Xunta de Galicia.